

Herrn Josef DIETHARDT (II),
Bauer und Ex-Bürgermeister aus
Eppenstein bei Weißkirchen († 1974),
Freund seiner steirischen Heimat
und ihrer Mundart, in Erinnerung
gewidmet

Johannes Diethart D'läizti Schtund fara Klammer Sefal

Kearn Säi a zuar däi Leit, fiar däina sHoroskoup in da Wouchnzeitung sEfangöili is, däis wos glaibig farschlingan, wäuls eana sBlau fan Himml oacha eiseisl?

Dounn geats Eana houffantli näit sou wia da Klammerin, da Sefal, fan Loamlouch, dera sHoroskoup fiars Wouchnäind d'scheansti Iwaroschung fa iarn gounzn Lebn fahoßn hot.

Und däi Uarschl hot droun glab, dawäul hot da Heerr Kaploun fara Kounzl oacha präidig, daß däis mit dSchtearn olls a oanziga Mumpitz is, wounn näit goar a Tuiflszuig fara Höill auffa. Und eigantli a groaßi Sind is, woumma uarschlhof droun glabn tat.

D'Sefal hot himmaramol fül af däis gkoltn, dabei woar s ar a brafa Kristnmäinsch, dear a untar dWouchn gearn in dKiarchn goungan is. An Sunnta souwiasou. D'oanzigi Jungi nebn a poar ausdiartri olti Schochtln. Und da Pfoarrar woar froa, daß do wäinigtstns oa jungs Gsicht zun sechn woar, wounn ar fan Fulksoltoar hear zua däin kloan Heifl Weiwar higschaut hot. Oas farunzlata und buglata ois d'ounare. Und wäinigtstns oa scheans mit apetitlichi Kuarfn. Wäul sei Käichin sölwa woar schiach wia dNocht, mit an uarndlichn Bukl und a poar Warzn mit loungi schwoarzi Boarschtn in Gsicht. Und in kanounischn Oltar woars a schoa, däi Gredl. Do is a gearn Mäißlesn goungan in ollar Fria. Und zwischn dWoundlung und dKomunjoun hots eam sou richti load tou, daß ara geistlicha Heerr woarn is. Sou hots eam nouch oana scheanan Frau glustat. Hätt ar sis friarar ibaläign miassn, dear guati Mou, daß sei Pischa näit nuar zun Wossalosn gmocht is.

Und dSefal? Däi hot si Sunnta Fria gounz bsundars schean gmocht, a feschas Diarndl mit Blusn ougläig, däis guat zuar ira Gretlfrisuar und zuar iarn scheanan Fuabau paßt hot. Däina Mounnsleit is immar sWossar in Maul zoummgrunnan, wounns da feschn Sefal in tiafn Ausschnitt houm einischaugn kinnan. Do is eana fost da Otn gschtoukt. Und Weiwarleit woarn richti eifarsichti af d'feschi Sefal. Wari ols Fraunzimmara a gwäin.

Nouchn Hoachoumb hot sas uarndli drawi gkob und is af da Schtöll ins Wiertshaus umi und ins Extraschtiabl einigsauß, wäul s fäist drou glab hot, daß dout heit da Tramprinz af ira woartn weard. Kreachn umi und schreams owi, hoabts bar uns, wounns oana goar sou alig hot. Sou wia dSefal heit.

In ira tiafstn Söll hot s owar nou oun d'echti Liab glab af dera Wölt. Owar s is holt nia wos Gscheits draus woarn in iarn Lebn. Wäul dMounnsleit jo sulchi Falouttn seind, hot s ouft gsog: däi an olls fahoßn und nia wos holtn. Däi an schnölln Rumpla mochn und dar glei a Kloas ouhäingan mäichtn, owar dounn nix mear fa diar wissn wölln.

Amol hätt jo da Eda Koarl, a sou a kloana Schlawina aus da Gaal, ba ira fäinstarln wölln, owar in sein Dusl is dear Dolm iwa dHeanarschteign eigschtign und in schuachtiafn Heanardräik gloundat. Sou hearzli glocht hot dSefal schoa loung neamma, wias in Pfoarrar farzölt hot, wia da Koarl si neman Houn sein Doumpf ausgeschlofn hot. Und s'gounzi Doarf hot holt widar uarndli wos zun Ausrichtn gkob.

In Sepp dafiar, dear s wiarkli gearn hätt hobn wölln, hot si zearscht bara Tiar aussigschmissn. Wäul sa si gschoumb hot, wäul s fara Kindaläimung a bißl oan hatschatn Fuaß zruk gkoltn hot. Und do hot s ban Kiartog näit sou richti tounzn käinnan wie d'anan Mäindscha.

Da Sepp woara feschas Mounnsbüld. Ear woar da Jungbauar fan Falmoar-Houf in Eppnschtoa. Dear hot näit loukar lossn. Und wia dSefal gsechn hot, daß dear näit sou a Falouft war wia d'ounan Mäinna, wullt s mit eam am Oasta-Sunnta Faloubung feiern in Säikau ban Houfwiart mit seini Leit aus Eppnschtoa und den iarign ausn Loamlouch, duat wous afgwoxn is.

Owar in Hulzschlog hot eana downn sSchicksol an uarndlichn Schtrich duarch dRechnung gmocht und eam an harbn Mognschtrudl gebm: An diarnn Grasbam hots ban Umschnein zarschplittat, eana Glik is zarbreslt, und eam hots in Schedl zarmearschat.

Do woars aus mit eanan Tram fan Glik, fan Heiratn und an Schouk rouziga Kinna in da groaßn Schtubn.

D'Sefal woar aufgräig wiara kloas Dearndl ban Beichtn foar d'earschtn Komunjoun. Und sMäinsch hot zittart wiara Lamplschwoaf, daß da Hearn Kaploun ira näit nouch da Unkeischheit frognt tat. Wäul sie sou fias Douktaschpün gwäin is, wias kleana woar, und wias da kloani Feardl gounz giarig ausgriffn hot. Dear kloani Wedl. Ira grausts heit nou, wounn s drou däinkt.

Und downn earscht driwar räidn: Näit zun Ausholtn.

Wia ira downn amol a Summafrischla, a Professar fa Wean, farzölt hot, daß am Äind fan 18. Joarhundart in Escharreich s bäisti Stuk faran Mounnsbüld in Earnnouman Pfoffnzarsch gkob hätt, isi zwoa Wouchn näit in dKiarchn goungan, sou hot s ira graust foar dPfoarrarn. Bleib da Mäinschheit wiakli nix daschpoart, wounn näit amol mear afs Boudnpearsounal fan Hearnougoutt Farloß is?

Hiaz owar widar mittn zruk eini in d'Gschicht. Unsar Sefal schteat in Extraschtiabl, schaut si um und säizt si downn alloa oun an Tisch. Bschtöullt hots a Ochtl Roatn. Nebm a poar öiltari Mäinna, däi mitanounda fleißi dischgariat und a fäist tschikt houm, sizt alloa a fescha Kampl in Schteiragwound und in bäistn Olta. A poar lari Kriagl foar eam. Dear woar wul näit in dKiarchn. D'Köllnarin hot Houns zu eam gso. Sie wulltn schoa ouräidn, in Houns, wäul dear sölwa nix dargleichn tou hot. Oan Bsuff und Heidn brauchat i näit dahoam, däinkt sa si. Und ear hot si wieda däinkt: Wos wüll denn däi Wam do? Wüll däi eppa wos fa mia? Owar fiar mear hots neamma greicht bar eam.

Owar wia dear downn nou sei Beischlsuppn wiara ausghungarts Farl obischliarft hot, is ira z'fül woarn und ois fargoungan: „Du Saubart!“ hot s nou laut gso, eam aus iri Augn ougfunklt, hot si downn umdrat und is, um a groaßi Houffnung äarma, zorni und zwidar ban Täimpl aussu und ins diksti Neblireißn eini.

Owar d'oarmi Sefal hot näit wissn kinnan, daß as glei uarndli daklatschn weard. Wäul dera Biat hots an Moutaradlfoara af da faregnatn Schtroßn fa Kobäinz eina ausgkoubn, wiara oana Häinn hot ausweichn wulln, und s hot eam sauba hiblattlt. Do is a downn zoumb da Maschin bis foa dTischlarei Mittarägga iban Geaschteig gschliffn, daß nuar sou gracht hot, und hot dSefal afoch niedagmat. S'Fourdaradl hot ira wiara Kroassog dBrust afgschnittn und ian scheanan Busn zarkwetscht wiara broattretni Kroat, däi an Tearz in Weg gwäin is. Do wearn füli Mounnsbülda fa Säikau bis eini in dGaal as Rearate kriagn, wounns däis hearn.

D'Maschin is downn nou in dGostschtribn fan Wiartshaus einikrocht und hot in feschn Biardippla mit Glosschearbn zuadäikt. In Foara sölwa hot s in a Hoslnußschtaudn einiprakt und eam sGnak oghaut. A Fulltreffar fan Schicksol, kinnt ma fost sogn, owar s'is wul gscheita, in Hearnougoutt näit dreizräidn ba seinar himmlischn Politik.

S'Läizti, wos dSefal nou gheart hot in ian Lebem, däis lounsoum aus ira aussagrunnan is, woara Schtimm wia fa tull weit hear:

Lous, Sefal, hiaz kimmb as Scheansti in dein Lebem, wiari dias in dein Horoskoup farhoäßn hob. Hiaz bist äindli dout, woust imma schoa host hiwölln.